

Date – 27/07/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Environment, Forest and Climate Change Department changtu Minister Pu Lalthansanga'n Mizo thalaite infiamna ah hma an sawn theih nan Bana Kaih hnuaiah infiamna kawnga hmasawnna tur hrang hrang atan sum dah a ni a ti.
2. Kumin thla 5 chhungin India ram hmun dang leh ram pawn atanga Mizorama lo zin mi sing 9 chuang an awm tawh a, khualzin zingah hian rel hmanga Mizorama rawn lut an tam ber.
3. Prime Minister Narendra Modia chaun exam dan kalphung siamtha tur high level task force din anih thu a puang.
4. Glasgow khawpuia Commonwealth Games 2026 neih mekah hmeichhe ritchawi chak Mirabai Chanu chuan India tana gold medal hmasa ber nimin khan a la.

<><><>

VIKSIT BHARAT SPORTS FESTIVAL 2026

Environment, Forest and Climate Change Department changtu Minister Pu Lalthansanga'n Mizo thalaite infiamna ah hma an sawn theih nan sawrkarin theihtawp a chhuah a ti a, Bana Kaih hnuaiah infiamna kawnga hmasawnna tur hrang hrang atan sum dah a ni a ti.

MSSC Wrestling Hall (Ramhlun Sports Complex) a Aizawl District Wrestling Championship, 2026 hawna hun a hmanpui na ah he thu hi sawiin Aizawl District Wrestling Association President Pu Lalthansanga chuan infiamna kawnga hmasawnna a awm theih nan sawrkarin theihtawp a chhuah a ti a, infiamna kawnga hlawhtling tur chuan ruihhlo laka fihlim a pawimawh tih sawiin taksa enkawl uluk a pawimawh tih sawiin mahni invawng takin state ti hmingthatu ni thei tura theihtawp chhuah a tul thu a sawi a ni.

<><><>

KARGIL VICTORY

Vairengte a CIJW School te chuan Kargil Vijay Diwas vawi 27-na chu urhsun takin an hmang.

He hun pual hian program chi hrang hrang buatsaih niin Vairengte chhunga sipai bangte te leh Veer Naris (sipai boral nupuite) te tan a thlawna doctor inentirna leh ha endik hun buatsaih a ni a. Outreach program hman chhunzawm niin he hun hmanpui tur hian wing commander Risanga (Officer-in-charge, ECHS Polyclinic

Aizawl) chu sawm a ni. He hunah hian khuallian a sawm Commandant CIJW school Major General Kulvir Singh chuan thusawi-in kalkhawm te hnenah Kargil War chungchangte sawiin Veer Naris (sipai boral nupui) te thilpek a hlan bawk a ni.

Kargil Vijay Diwas ah hian CIJW school a sipai officers te leh sipai training mek ten Vijay Run/Run of Honour chu zing dar 6-ah Vairengte helipad atangin CIJWS commandant-in a vailiam a. Vairengte joint YMA playground thleng tlanin a tawp an khar a ni.

Kargil Vijay Diwas hi kum 1999 May 3 atanga July 26 chhung India sipai leh Pakistan hel ho Jammu and Kashmir Kargil hmuna inkahna a sipai nunna chan tate hriat reng na’n kumtin July ni 26-ah hman thin a ni. He indonaah hian India lam chuan “Operation Vijay” hmangin Pakistan Hel ho chu an hneh a ni.

<><><>

TOURIST FOOTFALL

Kumin thla 5 chhungin India ram hmun dang leh ram pawn atanga Mizorama lo zin mi sing 9 chuang an awm tawh a, khualzin zingah hian rel hmanga Mizorama rawn lut an tam ber.

Mizoramah khualzin an pung zel a, Sairang rel chawlhmun hawn a nih hnuah Mizorama zin an pung nasa zual a. Toursim department-in an chhinchhiah danin kumin January atanga May thla chhungin Sairang rel chawlhmun, Lengpui tumhmun, Vairengte, Kanghmun leh Bairabi paltlanga Mizorama rawn lut, ILP pek khualzin mi sing 9 sang 8 leh 576 an awm a. Rel hmanga Mizorama rawn lut an tam ber a, Sairang Rel chawlhmun a rawn thleng ILP pek chhuah chu mi sing 4 sang 3 leh 298 an awm a, thla 5 chhunga khualzin zawng zawng atanga chhutin Rel hmanga Mizorama zin hi za zela 43 point 92 an tling a ni.

Thlawhna hmanga Mizorama zin a, Lengpui thlawhna tum hmuna ILP la mi 12,262 an awm bawk a, hei hi khualzin zawng zawng atanga chhutin za zela 12.43 a tling a. Lirthei hrang hrang hmanga Mizorama zin pawh an thahnem hle a, Assam state atanga Mizoram luhka Vairengte-a rawn lut, Police Check Gate atanga ILP la mi 16,010 an awm a, Kanhmun Police Checkgate paltlanga ILP la mi 1,049 leh Bairabi Police Check Gate atanga Mizorama rawn lut ILP la mi 25,957 awm bawkin, Lirthei hmanga Assam atanga Mizorama rawn lut hi an vaiin mi 43,016 an ni a; hei hi thla 5 chhunga Mizorama zin zawng zawng atanga chhutin za zela 43.63 a tling a, Rel leh Lirthei hmanga Mizoram rawn zin hi an in zat thuak a ni.

Toursim department-in an chhinchhiah chinah ram pawn mi, Foreigner Mizorama rawn zin hi a kum telin an pung zel a, kumin thla 5 chhunga Foreigner khualzin chu mi sang 7 leh 322 an awm tawh a, kum hmasa 2025-a January leh May chhunga foreigner khualzin zat nen khaikhin chuan kumin hian a let aia tamin an pung a, nikum thla 5 chhunga ramdangmi khualzin chu mi sang 2 leh 808 an ni a, 2024 thla 5 chhunga khualzin chu sang 2 leh 293 an awm bawk.

<><><>

MUHCS

Mizoram Universal Healthcare Scheme (MUHCS 2.0) hmangin tangka kum kal mekah damlo enkawlina atan chang vaibelchhe 60 chuang hman a ni tawh.

MUHCS website tarlan danin, kumin April atanga July thlengin damlo bill 20244 pek chhuah a ni tawh a, hemi atana pawisa pek chhuah zawng zawng chu cheng vaibelchhe 60, nuai 78 sing 9 sang 8 leh 606 a ni. Mizoram State Health Care Society (MSHCS)-in damlo bill pek chhuah tawh dan an tarlan danin, sorkar kum kal mek 2026-27 ah hian April-July 2026 chhungin Mizoram sorkarin MUHCS zawmtu damdawi-inte hnenah damlo enkawlna senso tur tum kua a pe chhuak a ni. Sorkar tangka kum liam ta, 2025-26-a April-July 2025 chhung khan MUHCS zawmtu damdawi-inte hnenah tum 20 pawisa pek a ni a, pawisa pek chhuahte chu damlo 23,560-te enkawlna senso cheng vaibelchhe 29 nuai 81 sing 8, sang 5 leh 410 a ni.

<><><>

FCRA

Mizoram sorkar leh kohhran hruaitute'n Foreign Contribution Regulation (FCRA) dan siamthatna atana rawtna an siamte central sorkarin a pawm lo a nih chuan Lok Sabha MP-in he dan siamthatna tur hi Parliament-ah a dodal dawn.

He thu hi Zirtawpni khan Chief Minister Pu Lalduhoma chuan Kawrthah khua-ah a sawi a. Kohhran hrang hrang hruaitute nen FCRA chungchanga an inrawnkhawmna a an thutlukna leh sorkar laipui-in he dan siamthat a tum dan an duh lohte an thlen chu pawm a nih loh chuan he dan siamthat tura rawtna Parliament a sawihon hunah Mizoramin Lok Sabha MP a neih chhun Pu Richard Vanlalhmangaiha chu dodal tura hrilh a ni dawn a ni, a ti. Zirtawpni zan khan ZPM party thuneitu sang chuan hemi chungchang hi an ngaihtuah tawh a. Chumi zulzui chuan nimin khan Chief Minister chenna inah Chief Minister hovin Council for Churches in Mizoram (CCM) leh Mizoram Kohhran Hruaitute Committee (MKHC) chuan an sawiho leh a ni. Heta kal khawmte hian dan siam that tura duan, tuna Bill ang ang hi chuan pawm theih lohah an ngai a. Tihdanglam rawtna hi Memorandum hmangin sawrkar in lo buatsaih se. Chief Minister in Home Minister hnenah appointment lo buaipui se, MKHC leh CCM hruaitu te nen Delhi ah Memorandum thehluh ni se tih rel a ni.

<><><>

BIOMETRIC ENROLMENT

Mizorama Bangladesh raltlante biometric enrolment zawhfel a nih tawh laiin Myanmar raltlante biometric enrolment tih hna chuan July thla bul atang khan hma a sawn lo.

Home department atanga thu dawn danin Bangladesh atanga Mizorama rawn raltlan mi 1,679 te mit-naute leh kutze thla lak hna hi July thla bul khan zawhfel a ni a. A hma lamah Serchhip district a awm mi 235, Lunglei district a awm mi 76 leh Aizawl district a awm mi 7 te biometric data chu lak khawm zawh vek a ni tawh a. Bangladesh raltlan tamna ber Lawngtlai district a mi 1,361 te biometric data erawh chu lak zawh a ni lawk lova, July thla bulah khan an zo fel ta a. Lawngtlai district hi a zauh bakah kal pawh harsatna hmun kilkhawr leh ramri hnaih khua a tam avangin hna thawh a harsa hle niin official-te chuan an sawi a. He district a awm Myanmar raltlan 6,328 zinga mi 6,054-te biometric data lak a ni tawh a, za zela 95 point 83 zawh fel a ni tawh a ni.

Myanmar raltlante biometric enrolment tih hna a chawlh rih chhan hi electoral roll Special Intensive Revision (SIR) kalpui a nih avanga district hrang hrang official-te an buai vang a nih an rin thu Home department hotute chuan an sawi a. Tun dinhmun thar berah chuan district 7 – Aizawl, Champhai, Lunglei, Siaha,

Mamit, Khawzawl leh Saitual te chuan an zo fel vek tawh a. District 4-in an la zo lova. Raltlan awm mek chhinchhiah zat 29,577 zinga 29,248 te biometric data chu lak zawh tawh a ni a. Zawh tawh chin hi za zela 98 point 89 niin Home department chuan an chhinchhiah a. Ministry of Home Affairs thu anga nikum July thla tawp atanga he hna hi thawh tan a ni a, tun thla chhung hian zawh fel hman a nih dawn leh dawn loh hriat a la ni lo a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

HIGH LEVEL TASK FORCE

Prime Minister Narendra Modia chaun exam dan kalphung siamtha tur high level task force din anih thu a puang. Video hmanga a thuchah thehdarhah he thu hi sawiin Pu Modia chuan technology lama mithiam Nandan Nilekani chuan he committee hi a ho dawn a ti a. He task force hian exam kalphung tihchak dan turte an ngaihtuah ang a. An ruahmanna thehlul azirin sawrkar chuan exam dan kalphung rintlak tak a siam dawn a ti bawk.

<><><>

MIRABAI CHANU GOLD

Glasgow khawpuia Commonwealth Games 2026 neih mekah hmeichhe ritchawi chak Mirabai Chanu chuan India tana gold medal hmasa ber nimin khan a la. Manipur nula Mirabai Chanu hian kg 48 huang inelnaah record thar siamin kg 190 a rit a chawi a. Kum 2018 leh 2022 ah Commonwealth games ah gold medal a lo la tawh bawk a ni.

Vice President CP Radhakrishnan leh Prime Minister Narendra Modia te chuan Mirabai Chanu chu an lawmpui thu an sawi a ni.

India hian medal lak tamah palina ni mekin gold pakhat, silver pahnih leh bronze pakhat a la tawh a ni.

<><><>

I DAY FOOTBALL

Mizoram Football Association-in India Independence Day denchhena a buatsaih thin ‘I Day Football Tournament 2026’ chu vawiin atangin khelh tan a ni ang.

Inelna hi RG Stadium-ah neih a ni dawn a, team 12 an inlan dawn a ni. Mizoram Premier League team 8, Aizawl District Football Association Fist Division team 2 leh state pawn atangin team pahnih (Ganggam SC (Churachandpur-Lamka) leh RFYC-Mumbai) te an lo tel dawn a ni.

Match hmasa ber hi chawhma dar 11-ah Chanmari leh Dinthar ten an khel dawn a, chawhnu lamah Saikhamakawn leh Mizoram Police te an inhmachhawn ve leh bawk ang.